

## Edizioni

- letto 217 volte

## Wallensköld

### I.

De bone amor vient seance et bonté,  
et amors vient de ces deus autresi.  
Tuit troi sunt un, qui bien i a pensé;  
ja a nul jor ne seront departi.  
Par un conseil ont ensemble establi  
li coreor, qui sont avant alé:  
de mon cuer ont fet leur chemin ferré;  
tant l'ont usé, ja n'en seront parti.

### II.

Li coreor sunt la nuit en clarté  
et le jor sont por la gent oscurci:  
li douz regart plesant et savoré,  
la granz biautez et li bien que g'i vi;  
n'est merveille se je m'en esbahi.  
De li a Deus le siecle enluminé,  
car qui avroit le plus biau jor d'esté,  
lez li seroit obscurs a plain midi.

### III.

En amor a paor et hardement:  
li dui sont troi et du tierz sont li dui,  
et grant valeur est a eus apendant,  
ou tout li bien ont retret et refui.  
Por c'est Amors li hospitaus d'autrui  
que nus n'i faut selonc son avenant.  
G'i ai failli, dame, qui valez tant,  
a vostre ostel, si ne sai ou je sui.

### IV.

Or n'i a plus fors qu'a li me conmant,  
car touz biens fez ai lessié pour cestui  
ma bele joie ou ma mort i atent,  
ne sai le quel, dès que devant li fui.  
ne me firent lors si oeil point d'ennui,  
ainz me vindrent ferir si doucement  
par mi le cuer d'un amoreus talent  
oncore i est li cous que j'en reçui.

### V.

Li cous fu granz, il ne fet qu'enpoirier,  
ne nus mires ne m'en porroit saner,  
se cele non qui le dart fist lancier.  
Se de sa main i daignoit adeser,  
bien en porroit le coup mortel oster  
a tout le fust, dont j'ai grant desirrier  
mès la pointe du fer n'en puet sachier,  
qu'ele bruisa dedenz au cop doner.

**VI.**

Dame, vers vous n'ai autre messagier  
par cui vous os mon corage envoier  
fors ma chanson, se la volez chanter.

- letto 100 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/edizioni-135>